

Акафист иже во святых отцу нашему Святителю Иоанну, Сан-Францисскому и Шанхайскому чудотворцу

*Составлен иеромонахом Серафимом Платимским (Роузом) в честь
своего духовного наставника*

Кондак 1

Избранный Чудотворче и изрядный Угодниче Христов, всему миру источай многоценное миро вдохновения и чудес неисчерпаемое обилие. Восхваляем тя с любовию и да зовем ти: Радуйся, святителю отче наш Иоанне, последних времен Чудотворче!

Икос 1

Ангела образом яви тебе в последняя времена вся твари Создатель с милостию Божией пецыся о людех земных. Взирая на добродетели твоя, преблаженне Иоанне, вопием ти сице: Радуйся, с раннего детства благочестием украшенный! Радуйся, со страхом и трепетом волю Божию исполняющий! Радуйся, являющий благодать Божию в тайных благодеяниях! Радуйся, быстрое далече сущих страждущих услышание!

Радуйся, любвеобильное поспешение ближним своим во спасение! Радуйся, радование всем с верою к тебе припадающим! Радуйся, святителю отче наш Иоанне, последних времен Чудотворче!

Кондак 2

Видяще обильное добродетелей твоих изливание, святителю славный Иоанне, яко живоносный источник чудес Божиих напойши нас, верно вопиющих к Богу: Аллилуиа!

Икос 2

Разум, преисполненный любве, якоже и богословия, богомудре Иоанне, и богознанием умудренный и к страждущим людям любовью украшенный, познавати нас Истиннаго Бога научи, яко и мы во умилении да вопием ти: Радуйся, непоколебимая твердыня Истины Православия! Радуйся, драгоценный сосуд даров Духа Святаго! Радуйся, честный обличитель неверия и лжеучения! Радуйся, ревностный исполнитель заповедей Божиих! Радуйся, подвижниче недремлющий, не дающий себе отдохновения! Радуйся, возлюбленный пастырю стада Христова! Радуйся, святителю отче наш Иоанне, последних времен Чудотворче!

Кондак 3

Силою благодати Божией благой сиропитатель и наставниче юношам явился еси, воспитая в страхе Божиим и приуготовляя их к служению Богови. Сего ради чада твоя взирают на тя и благодаряще вопиют Богу: Аллилуиа!

Икос 3

Имеяще воистину, отче Иоанне, с небесе песнь тебе воспеваему быта, а не от земли: како бо кто от человек возможет твоих дел величие проповедати. Мы же, принося Богу яже имамы, вопием ти сице: Радуйся, непрестанною молитвою покрывающий чада твоя! Радуйся, охранитель стада твоего Крестным знаменем! Радуйся, любви великой вместилище, не взирающий на различие языков! Радуйся, светильниче всесветлый и вселюбимый! Радуйся, образе кротости духовныя! Радуйся, сладостей духовных подателю нуждающимся! Радуйся, святителю отче наш Иоанне, последних времен Чудотворче!

Кондак 4

Бурею духовною одолеваемы: како достойно есть хвалити чудеса твоя, блаженне Иоанне. Яко прошел еси до конец вселенныя спасения ради и благовествования Евангелия сущим во тьме. Благодаряще Бога за апостольские труды твои, мы воспеваем Ему: Аллилуиа!

Икос 4

Слышаша ближние и дальние величие чудес твоих, Божией милостью даже до нашего времени являемых. В тебе Богу прославляющемуся мы дивящися и в страхе вопием: Радуйся, просветитель сущих во тьме неверия! Радуйся, приведший людей твоих с Востока дальнего до Запада! Радуйся, источниче чудес изливаемых Богом! Радуйся, с любовью вразумляющий заблудших! Радуйся, скорый утешитель кающихся во гресех своих! Радуйся, опора грядущих путем правым! Радуйся, святителю отче наш Иоанне, последних времен Чудотворче!

Кондак 5

Боготечный свет явился еси, бури всех лютых разгоняющий, сущих на острове от вихрей смертоносных молитвами твоими охраняяй, святителю Иоанне, и крестным знаменем ограждаяй. Научи и нас, призывающих тя в помощь, Чудотворче Святыи, к Богу с дерзновением взывати: Аллилуиа!

Икос 5

Видевше многую помощь твою в напастех и обстояниях, преблаженне отче Иоанне, дерзновенный бо ходатай пред Престолом Божиим и скорый в бедах помощниче еси. Того ради и мы на твое покровительство пред Богом уповаем и вопием ти: Радуйся, стихий опасных прогонителю! Радуйся, молитвою твоею от нужд избавляющий! Радуйся, голодающим хлеба присный подателю! Радуйся, приуготовляяй просящим изобилие! Радуйся, утешителю в скорбех сущих! Радуйся, многих падших от погибели исхитивший! Радуйся, святителю отче наш Иоанне, последних времен Чудотворче!

Кондак 6

Проповедующий яко новый Моисей гугнивый явился еси, изводя люди твоя из плена рабства, преблаженне Иоанне. Избави и нас от рабства греховнаго и врагов Божияго спасения, якоже и мы вопием к Богу: Аллилуиа!

Икос 6

Возсия молитвою твоею, совершил еси неисполнимое, о, добрый Пастырю, и склонил власти мирския сострадати о людях твоих. Того ради с ними купно и мы благодарственно вопием ти: Радуйся, усердно ты призывающим верно помогающий! Радуйся, избавляющий от неправеднаго убиения! Радуйся, сохраняющий от клеветы и злословия! Радуйся, обороняющий невинных от уз! Радуйся, отразитель от нападения нечестивых! Радуйся, помрачителю лжи и проявителю истины! Радуйся, святителю отче наш Иоанне, последних времен Чудотворче!

Кондак 7

Хотя пламенно прославити святых Запада, отпадшего от истины, восстановил еси почитание их в Церкви Православной, о любителю преподобных Востока и Запада. Днесь с ними на небеси моли Бога о нас, поющих на земли Богу: Аллилуиа!

Икос 7

Новаго видеша ты избранника Божьяго иже вкупе со святителями древней Галлии, ты явился еси в последняя времена яко един от сих, вдохновляя паству твою соблюдать Православную веру яко же сии на Западе исповедаху. Сохрани и нас в вере сей пребывати, вопиющих ти: Радуйся, новый Мартыне в воздержании, подвигах и чудесех твоих! Радуйся, новый Германе во исповедании твоём Православныя веры! Радуйся, новый Иларие в Божественном богословии! Радуйся,

новый Григорие, в почитании и прославлении угодников Божиих! Радуйся, новый Фавсте твоею нежною любовью и усердием иноческим! Радуйся, новый Цесарий в твердой любви Правилам Церкви Божией! Радуйся, святителю отче наш Иоанне, последних времен Чудотворче!

Кондак 8

Страшное чудо видехом к концу земнаго жития твоего, страсотерпче святой Иоанне, возведен был еси в Новый Свет, проповедаше там Христианство Древнее и приял еси гонение ради праведности твоей, душу твою приуготовляя Царства Небеснаго ради. Удивляясь ныне терпению и многостраданию твоему, благодарно вопием к Богу: Аллилуиа!

Икос 8

Весь еси был делателю винограда Христова, Богоносне Отче, не ведал еси покоя ни до конца многотруднаго живота твоего, помози и нам недостойным в деланиях наших, будем и мы прилежаще верно Богу, дивный угодниче Божий Иоанне, яко славяще вопием ти: Радуйся, претерпевый до конца и достигший спасения! Радуйся, пред иконой Богоматери умерети сподобившийся! Радуйся, среди гонения неправеднаго мужественный веры хранителю! Радуйся, яко добрый пастырю стаду твоему, правящим иерархом кончину сидяще приемший! Радуйся, после смерти утешивший паству чудесным своим возвращением! Радуйся, многих чудес подателю к раке твоей с верою и любовью притекающим! Радуйся, святителю отче наш Иоанне, последних времен Чудотворче!

Кондак 9

Все естество ангельское восхождением твоея души в небесныя обители возрадовалось, мы же удивляясь твоим чудесем на земли, действием Святаго Духа являемым, воспеваем Богу: Аллилуиа!

Икос 9

Ветии многовещанные не возмогут извещи крепость святаго жития твоего, о, праведне отче Иоанне, неизреченнаго Бога святилище. О, дивное явление Божие нашему маловерному времени, немолчно прославляем тя, вопиющи таковая: Радуйся, Божественных повелений палата! Радуйся, малое и слабое ангельских обителей вместилище! Радуйся, лестнице, еюже удобно восходим на небеса! Радуйся, лечебница всякия недуги скоро врачующая! Радуйся, молитвеннаго подвига тайное хранилище! Радуйся, светлоукрашенный храм Духа Святаго! Радуйся, святителю отче Иоанне, последних времен

Чудотворче!

Кондак 10

Спасти хотя мир, иже всех Спаситель новаго святого послал еси нам. Тем через него из темных глубин греха возвал еси нас. Слышаше тя, нас к покаянию взывающе, преблаженне отче Иоанне, мы, в добродетели убогия, взываем сице к Богу: Аллилуиа!

Икос 10

Стена еси всем прибегающим к твоему небесному заступничеству, отче Иоанне, тем же и нас от демонскаго ополчения ограждай, от недугов, напастей и нужд различных освобождай, с верой к тебе взывающих: Радуйся, ослепших прозрение! Радуйся, силою молитвы жизнь на смертном одре сущим подающий! Радуйся, от мятежа и брани соблюдай! Радуйся, спасительная влага погибающих в огне печали орошающая! Радуйся, одиноких и оставленных отеческое заступление! Радуйся, Святый Учителю ищущих истину! Радуйся, святителю отче Иоанне, последних времен Чудотворче!

Кондак 11

Пение непрестанное ко Пресвятой Троице, преблаженне отче Иоанне, мыслию, речию и доброделанием принесл еси: многим разумением истинной Веры повеления уяснил еси, верою, надеждою и любовию наставляя нас в Троице Единому Богу воспевати: Аллилуиа!

Икос 11

Светодательный светильник Православия сущим во мраке невежества явился еси, стада Христова добрый пастырю. Тако и но успении твоём являеши истину неведущим ея, души верных просвещающе, вопиющим ти таковая: Радуйся, просвещение мудрости Божией сущим в неверии! Радуйся, радуга тихой радости кротких! Радуйся, громе, устрашающий во грехе упорствующих! Радуйся, молния, ереси пожигающая! Радуйся, одождие догматов Православия! Радуйся, орошение Богомыслия! Радуйся, святителю отче наш Иоанне, последних времен Чудотворче!

Кондак 12

Благодать, данную ти от Бога излившуюся ведающе: сию с благоговением и благодарностию восприимем, к заступлению твоему чудному притекающе, о, всехвальне отче Иоанне, твоя чудеса прославляя, взываем к Богу: Аллилуиа!

Икос 12

Поюще хвалу Богу, в тебе кротком и смиренном рабе дивно бо прославился, падшему и безверному миру явился, ничтоже сотворшему равного дарованию чудес твоих. Ими же удивляючися, со святыми кланяемся и почитаем тя: Радуйся, новая праведности звезда на небосводе воссиявшая! Радуйся, новый пророче, от воцарения зла нас избавляющий! Радуйся, новый Ионе, о гибели пророчествующий от греха! Радуйся, новый Крестителю, призываяй всех к молитве и покаянию! Радуйся, новый Павле, тяготы проповеди Евангелия понесший! Радуйся, новый апостоле, светлое веры проповедание! Радуйся, святителю отче Иоанне, последних времен Чудотворче!

Кондак 13

О, Пресветлый и Предивный Угодниче Божий, святителю отче наш Иоанне, утешение всех в скорбех сущих, нынешнее наше молитвенное прими приношение да Господа умоли от геены избавиться нам богоприятным твоим ходатайством, ибо сам по смерти изрек: «Скажите народу, хотя я и умер, но я жив»: Аллилуиа!

(Сей кондак глаголи трижды. Затем паки читется Икос 1 и Кондак 1)